

**Nodavlat ta'lim xizmatlarini
ko'rsatish sohasidagi
faoliyatni litsenziyalash
to'g'risida
USLUBIY QO'LLANMA**

Toshkent – 2025

Nodavlat ta'lim xizmatlarini ko'rsatish sohasidagi faoliyatni litsenziyalash to'g'risida uslubiy qo'llanma T.: O'zbekiston Respublikasi Adliya vazirligi, 2025-yil. – 18 bet.

Mazkur uslubiy qo'llanma nodavlat ta'lim xizmatlarini ko'rsatish sohasida faoliyatni litsenziyalash tartibini amaliy jihatdan tushunarli va izchil yoritishga qaratilgan. Qo'llanmada litsenziya olish uchun qo'yiladigan asosiy talablar, zarur hujjatlar, ariza topshirish bosqichlari, vakolatli organlar bilan o'zaro hamkorlik tartibi hamda litsenziya berish (yoki rad etish) mezonlari qisqa va aniq bayon etiladi.

Ushbu qo'llanma nodavlat ta'lim tashkilotlarini tashkil etayotgan tashabbuskorlar, rahbarlar, yuristlar hamda ta'lim xizmatlarini qonuniy yo'lga qo'yishni maqsad qilgan barcha manfaatdor shaxslar uchun mo'ljallangan. Qo'llanma amaldagi normativ-huquqiy hujjatlar talablari asosida tayyorlangan bo'lib, litsenziyalash jarayonida xatolarning oldini olish va hujjatlarni to'g'ri rasmiylashtirishda amaliy yordam beradi.

Ushbu uslubiy qo'llanma tavsiyaviy xususiyatga ega.

© O'zbekiston Respublikasi Adliya vazirligi, 2025-yil.

MUNDARIJA

Foydalanilgan normativ-huquqiy hujjatlar.....	4
Kirish.....	5
Umumiy qoidalar.....	6
Litsenziya olish uchun zarur hujjatlar.....	8
Litsenziya berishda kelishiladigan organlar	11
Ilovalar.....	13

Foydalanilgan normativ-huquqiy hujjatlar

O'zbekiston Respublikasining "Litsenziyalash, ruxsat berish va xabardor qilish tartib- taomillari to'g'risida"gi Qonuni	
O'zbekiston Respublikasi Prezidentining "Tadbirkorlik subyektlariga davlat xizmatlarini ko'rsatish mexanizmlarini takomillashtirishga doir qo'shimcha chora-tadbirlar to'g'risida" 2017-yil 1-fevraldagi PQ-2750-son qarori	
Vazirlar Mahkamasining 2022-yil 21-fevraldagi 80-son "Maxsus elektron tizim orqali ayrim faoliyat turlarini litsenziyalash tartibi to'g'risidagi yagona nizomni tasdiqlash haqida"gi qarori	

KIRISH

So'nggi yillarda mamlakatimizda ta'lim sohasini modernizatsiya qilish, inson kapitalini rivojlantirish va mehnat bozorining tez o'zgarayotgan talablariga mos malakali kadrlar tayyorlash ustuvor yo'nalishlardan biriga aylandi. Shu jarayonda davlat ta'lim tizimi bilan bir qatorda nodavlat ta'lim xizmatlari ham jadal rivojlanib, fuqarolar uchun kasbiy qayta tayyorlash, til o'rganish, IT va raqamli ko'nikmalar, imtihonlarga tayyorgarlik, qo'shimcha ta'lim hamda turli qisqa muddatli kurslar bo'yicha imkoniyatlar kengaymoqda. Raqobatning kuchayishi ta'lim sifatiga ijobiy ta'sir ko'rsatayotgani bilan birga, ta'lim xizmatlarini tashkil etishdagi mas'uliyat, shaffoflik va qonuniylik masalalarini ham dolzarb qilmoqda.


Mazkur uslubiy qo'llanma nodavlat ta'lim xizmatlarini ko'rsatish sohasidagi faoliyatni litsenziyalash jarayonini izchil va tushunarli yoritishga qaratilgan. Qo'llanmada litsenziya olishga tayyorgarlik ko'rish bosqichlari, talab etiladigan hujjatlarning umumiy mazmuni, ta'lim faoliyatini tashkil etishda e'tibor qaratilishi lozim bo'lgan asosiy masalalar (tashkiliy-huquqiy rasmiylashtirish, o'quv jarayonini yo'lga qo'yish, xodimlar salohiyati, moddiy-texnik baza, ichki tartib-qoidalar va huquqiy risklarni boshqarish) hamda uchraydigan xatolar va ularning oldini olish bo'yicha amaliy tavsiyalar bayon etiladi.

UMUMIY QOIDALAR

Litsenziyalanadigan faoliyatning kichik turlari:

- ✓ **maktabgacha ta'lim xizmatlari (bundan oilaviy nodavlat maktabgacha ta'lim tashkilotlarining xizmatlari mustasno);**
- ✓ **umumiy o'rta ta'lim xizmatlari;**
- ✓ **o'rta maxsus ta'lim xizmatlari;**
- ✓ **kasbiy ta'lim xizmatlari;**
- ✓ **oliy ta'lim xizmatlari;**
- ✓ **oliy ta'limdan keyingi ta'lim xizmatlari.**

Kimlar ariza berishi mumkin?



Yuridik shaxslar

Qaysi organlar litsenziyalovchi organ hisoblanadi?



O'zbekiston Respublikasi Maktabgacha va maktab ta'limi vazirligi;



O'ZBEKISTON RESPUBLIKASI
OLIY TA'LIM, FAN VA INNOVATSIYALAR
VAZIRLIGI

O'zbekiston Respublikasi Oliy ta'lim, fan va innovatsiyalar vazirligi.

Arizani ko'rib chiqish uchun to'lanadigan yig'im miqdori qancha?



Bazaviy hisoblash miqdorining 2 baravari

LITSENZIYANI OLISH UCHUN TAQDIM QILINADIGAN HUJJATLAR



I. Maktabgacha va umumiy o'rta ta'lim xizmatlari uchun:

a) ariza;

- ✔ arizada quyidagilar ko'rsatiladi:
- ✔ yuridik shaxsning nomi va tashkiliy-huquqiy shakli,
- ✔ pochta manzili, elektron pochta (mavjud bo'lsa), ta'lim faoliyatini amalga oshirish manzili,
- ✔ bank muassasasining nomi va bank hisobvarag'i,
- ✔ soliq to'lovchining identifikatsiya raqami (STIR),
- ✔ faoliyatning litsenziyalanayotgan turi, ta'lim faoliyati yo'nalishlari ro'yxati,
- ✔ ariza to'ldirish sababi (yangi litsenziya olish, qayta rasmiylashtirish), litsenziya talabgorining litsenziya talablari va shartlariga rioya qilishga roziligi;

b) o'quv rejasi va dasturlarining elektron nusxalari.



II. O'rta maxsus, kasbiy, oliy va oliy ta'limdan keyingi ta'lim xizmatlari uchun:

a) ariza.

- ✔ arizada quyidagilar ko'rsatiladi:
- ✔ yuridik shaxsning nomi;
- ✔ faoliyatning litsenziyalanayotgan turi;
- ✔ kadrlar tayyorlash rejalashtirilayotgan sohalar, ta'lim jarayonlari yo'lga qo'yilishi rejalashtirilayotgan yo'nalishlar, kasblar yoki mutaxassisliklar ro'yxati (ta'lim shakllari ko'rsatilgan holda);
- ✔ ariza to'ldirish sababi (yangi litsenziya olish, o'zgartirish, qayta rasmiylashtirish);
- ✔ kadrlar tayyorlash yo'lga qo'yilayotgan ta'lim dasturlari bo'yicha qabul rejasi (to'liq o'qish davomiyligi ko'rsatilgan holda);
- ✔ pochta manzili, elektron pochta, mobil telefon raqami, faoliyatni amalga oshirish joyining telefon raqami (mavjud bo'lgan taqdirda);
- ✔ talabgorning litsenziya talablari va shartlariga rioya qilishga roziligi;

b) tashkil etilayotgan ta'lim tashkilotining nomi, maqomi, boshqaruv tizimi, boshqaruv kadrlari, asosiy ta'lim va ilmiy faoliyat yo'nalishlari, qabul parametrlari, ta'lim sifatini ta'minlash tizimi va vositalari, to'lov-kontrakt miqdori va uning hisob-kitobi, shuningdek, ta'lim tashkilotini rivojlantirish bo'yicha besh yillik strategik rejasini o'z ichiga olgan konsepsiya;

v) bank muassasasi tomonidan tasdiqlangan hisobvarag'ida zaxira mablag'lar to'g'risidagi ma'lumotlar;



g) qabul qilinadigan talaba (o'quvchi, izlanuvchi)lar soniga mos ravishda o'quv binolari, talabalar turar joyi va o'quv jarayonini tashkil etish bilan bog'liq boshqa yer, bino va inshootlarning tegishli hujjatlari (oldi-sotdi shartnomasi, ko'chmas mulk obyektiga egalik qilish hujjati yoki foydalanish uchun kamida **5 yil** muddatga tuzilgan ijara (tekin foydalanish) shartnomasi, shuningdek, ko'chmas mulk obyekting kadastr pasporti, undan foydalanish va uni tasarruf etish huquqini tasdiqlovchi boshqa hujjatlar



LITSENZIYA BERISHDA KELISHILADIGAN ORGANLAR



Davlat yong'in nazorati organlari tomonidan mavjud binolar va xonalarning yong'in xavfsizligi talablariga muvofiqligi to'g'risidagi xulosa **(5 ish kuni ichida);**

Sog'liqni saqlash vazirligi huzuridagi Sanitariya-epidemiologik osoyishtalik va jamoat salomatligi qo'mitasi organlari tomonidan sanitariya-gigiyena normalariga muvofiqligi to'g'risidagi xulosa **(5 ish kuni ichida);**



Sog'liqni saqlash vazirligining xulosalari (faqat ixtisoslashtirilgan nodavlat maktabgacha ta'lim tashkilotlari faoliyatini litsenziyalashda) **(5 ish kuni ichida);**

Qurilish va uy-joy kommunal xo'jaligi sohasida nazorat qilish inspeksiyasi tomonidan obyektida shaharsozlik norma va qoidalarida belgilangan talablarga muvofiq nogironligi bo'lgan shaxslar uchun to'siqlarsiz muhit yaratilganligi to'g'risidagi xulosa **(5 ish kuni ichida);**





Maktabgacha va maktab ta'limi vazirligining xulosasi (pedagogik ta'lim yo'nalishlarida ta'lim jarayonini tashkil etish istagidagi nodavlat oliy ta'lim xizmatlarini ko'rsatish faoliyatini litsenziyalashda) **(5 ish kuni ichida).**

BILIB OLING!

I. Maktabgacha va umumiy o'rta ta'lim xizmatlari uchun:



Nodavlat ta'lim xizmatlari ko'rsatuvchi yuridik shaxslarga ta'limning har bir turi uchun alohida litsenziya beriladi. Litsenziyada faoliyatning litsenziyalanayotgan turi, ta'lim faoliyati yo'nalishlari ro'yxati va ta'lim shakllari aniq ko'rsatiladi.

II. O'rta maxsus, kasbiy, oliy va oliy ta'limdan keyingi ta'lim xizmatlari uchun:



Nodavlat ta'lim xizmatlari ko'rsatuvchi yuridik shaxslarga ta'limning har bir turi uchun alohida Litsenziya beriladi. Litsenziyada yuridik shaxsning nomi, tashkilotning STIR raqami, yuridik (pochta) manzili, faoliyatni amalga oshirish manzili, faoliyatning litsenziyalanayotgan turi, ta'lim faoliyati yo'nalishlari ro'yxati va ta'lim shakllari, litsenziya berilgan sana va vaqti ko'rsatiladi.

ILOVALAR

1-ilova

Maktabgacha ta'lim xizmatlari bo'yicha litsenziya talablari va shartlari (bundan oilaviy nodavlat maktabgacha ta'lim tashkilotlarining xizmatlari mustasno)

T/r	Litsenziya talablari va shartlari	Bajarilishi lozim bo'lgan ko'rsatkichlar
1.	O'quv va o'quv-metodik adabiyotlar hamda axborot-resurs bazasi bilan ta'minlanganligi:*	kamida 2 ta kompyuter texnikasi hamda ekran o'lchami kamida 40 duym bo'lgan televizor bilan jihozlangan maktabgacha ta'limning dasturlarini amalga oshirish uchun o'quv xonasi yoki axborot-resurs markazi; o'quv va o'quv-metodik adabiyotlarning tarbiyalanuvchilar umumiy soniga nisbati — 1/6.
2.	Bitta guruhdagi tarbiyalanuvchilarning maksimal soni:*	3 yoshgacha guruhda — 20 nafar; 3-5 yoshlilar guruhida — 25 nafar; qisqa muddatli guruhda — 30 nafar.
3.	Bitta guruh uchun kiritiladigan tarbiyachi va tarbiyachi yordamchisi shtat birliklarining minimal miqdorlari:*	a) tarbiyachi: 9 soatli — 1,25 shtat birligi; 10,5 soatli — 1,46 shtat birligi; 12 soatli — 1,67 shtat birligi; 24 soatli — 2,2 shtat birligi; b) tarbiyachi yordamchisi: 9 soatli — 1 shtat birligi; 10,5 soatli — 1,15 shtat birligi; 12 soatli — 1,25 shtat birligi; 24 soatli — 1,5 shtat birligi.
4.	Maktabgacha ta'lim tashkiloti binosining sig'imiga qo'yiladigan minimal talablar:*	devor yoki panjara bilan o'rab olingan hududiga va alohida kirish-chiqish joyiga ega bo'lgan: a) alohida binolarda tashkil etilganda tarbiyalanuvchilar soni 385 nafardan oshmasligi; b) ko'p qavatli turar joy binosining birinchi qavatida tashkil etilganda tarbiyalanuvchilar soni: shahar joylarda — 75 nafargacha;

		qishloq joylarda — 60 nafargacha; individual binolarda — 150 nafargacha bo'lishi lozim.
5.	Maktabgacha ta'lim tashkilotida ma'muriyat va har bir guruh uchun talab etiladigan xonalar va har bir tarbiyalanuvchi uchun ajratiladigan maydon o'lchami:*	a) ma'muriyat uchun: rahbar xonasi — 1 ta xona; metodist xonasi — 1 ta xona; tibbiyot xonasi — 1 ta xona; b) mashg'ulotlar va o'yinlar uchun: poyabzalni almashtirish xonasi shkaflari bilan (har bir guruh uchun) — 5,0 m ² ; mashg'ulotlar va o'yin xonasi — 3,3 m ² ; yotoqxona — 3,3 m ² ; ovqatlanish joyi (har bir guruh uchun) — 18 m ² ; musiqa va jismoniy tarbiya mashg'ulotlari o'tkazish zali — 2 m ² ; kutubxona — 18 m ² ; v) xo'jalik ishlari uchun: taom tayyorlash xonasi; taom tarqatish xonasi; idish-tovoq yuvish xonasi; kir yuvish va quritish xonasi; choyshablarni saqlash joyi (shkaf); tozalash vositalarini saqlash joyi (shkaf); oziq-ovqat mahsulotlari saqlash omborxonasi; ma'muriyat, tarbiyachilar va xodimlar, har bir tarbiyalanuvchilar guruhi uchun alohida hojatxona.
6.	Maktabgacha ta'lim tashkiloti binosining ichki qismida har bir tarbiyalanuvchi uchun ajratiladigan maydon o'lchami:*	umumiy tipdagi uchun — 3,3 m ² ; ko'p qavatli turar joy binosining birinchi qavati uchun — 2,8 m ² .
7.	Ijtimoiy himoyaga muhtoj oilalar farzandlariga imtiyoz taqdim etilganligi:*	jami tarbiyalanuvchilar umumiy sonining 10 foizidan kam bo'lmagan miqdorda ijtimoiy himoyaga muhtoj oilalarning farzandlari bepul qabul qilingan bo'lishi lozim.

Umumiy o'rta ta'lim xizmatlari bo'yicha litsenziya talablari va shartlari

T/r	Litsenziya talablari va shartlari	Bajarilishi lozim bo'lgan ko'rsatkichlar
1.	O'quv va o'quv-metodik adabiyotlar hamda axborot-resurs bazasi bilan ta'minlanganligi:*	kamida 30 ta kompyuter texnikasi bilan jihozlangan elektron kutubxona; kamida 5 ta kompyuter texnikasi, skaner va nusxa ko'chirish apparati bilan jihozlangan axborot-resurs markazi; ta'lim oluvchilarga har bir fandan bir donadan darsliklar, shu jumladan, elektron darsliklar.
2.	Bitta sinfdagi ta'lim oluvchilarning maksimal soni:*	umumiy o'rta ta'lim tashkilotida: 1-4-sinflarda — 20 nafar; 5-9-sinflarda — 24 nafar; 10-11-sinflarda — 20 nafar.
3.	Ta'lim oluvchilar soniga to'g'ri keladigan o'qituvchilar shtat birliklari:*	umumiy o'rta ta'lim tashkilotida: 1-4-sinflarda — 25 nafar ta'lim oluvchiga 1 shtat birligi; 5-9-sinflarda — 12 nafar ta'lim oluvchiga 1 shtat birligi; 10-11-sinflarda — 13 nafar ta'lim oluvchiga 1 shtat birligi.
4.	O'qituvchilarning malaka toifalariga (lavozimlariga) ko'ra salohiyati:*	mutaxassislar (oliy ma'lumotli o'qituvchilar) — 30%; ikkinchi malaka toifalilar (katta o'qituvchilar) — 30%; birinchi malaka toifalilar (yetakchi o'qituvchilar) — 20%; oliy malaka toifalilar (bosh o'qituvchilar) — 20%.
5.	Chet tili o'qituvchilarining chet tilini bilishi darajasi:*	ingliz tilidan — C1 va undan yuqori darajadagi milliy sertifikat yoki International English Language Testing System (IELTS 6), Test of English as a Foreign Language (TOEFL IBT 72), Cambridge Assessment English FCE xalqaro imtihon tizimlari bo'yicha tilni bilish darajalari C1 va undan yuqori; nemis tilidan — C1 va undan yuqori darajadagi milliy sertifikat yoki Goethe-Zertifikat, Deutsches Sprachdiplom (DSD),

		Test Deutsch als Fremdsprache (Test DAF) xalqaro imtihon tizimlari bo'yicha tilni bilish darajalari C1 va undan yuqori; fransuz tilidan — C1 va undan yuqori darajadagi milliy sertifikat yoki Diplôme d'Etudes en Langue Française (DEL F), Test de Connaissance du Français (TCF) xalqaro imtihon tizimlari bo'yicha tilni bilish darajalari C1 va undan yuqori; yapon tilidan — C1 va undan yuqori darajadagi milliy sertifikat yoki Japanese Language Proficiency Test (JLPT № 2) xalqaro imtihon tizimlari bo'yicha tilni bilish darajalari C1 va undan yuqori; boshqa tillardan — C1 va undan yuqori darajadagi milliy sertifikat yoki xalqaro imtihon tizimlari bo'yicha tilni bilish darajalari C1 va undan yuqori.
6.	Umumiy o'rta ta'lim tashkilotining hududiga qo'yiladigan talablar:*	devor yoki panjara bilan o'ralganligi; ko'kalamzorlashtirilganligi; tungi yoritgichlar o'rnatilganligi; ichimlik suv va kanalizatsiya bilan ta'minlanganligi; stadion (o'yin maydoni) va dam olish qismlarining mavjudligi.
7.	Umumiy o'rta ta'lim tashkilotining hududida har bir ta'lim oluvchi uchun ajratiladigan umumiy maydon o'lchami:*	40 — 630 nafar — 20 m²; 631 — 989 nafar — 15 m²; 990 nafardan ortiq — 10 m².
8.	Umumiy o'rta ta'lim tashkilotidagi xonalar hamda har bir ta'lim oluvchi yoki xodim uchun ajratiladigan maydon o'lchami:*	a) ma'muriyat uchun: rahbar xonasi — 1 ta xona; o'qituvchilar xonasi — 1 ta xona; metodik xona — 1 ta xona; ma'naviyat va ma'rifat xonasi — 1 ta xona; yoshlar yetakchisi xonasi — 1 ta xona; psixolog xonasi — 1 ta xona; tibbiyot xonasi — 1 ta xona; b) dars mashg'ulotlari uchun: barcha fanlardan umumiy tipdagi sinfxonalar — 2 m²; boshlang'ich sinf xonalari — 2 m²; frontal va individual mashg'ulotlar uchun sinfxonalar — 2,5 m²; rasm, chizmachilik, musiqa fanlari uchun xonalar — 2,4 m²; informatika xonasi — 2,5 m²;

		chaqiriqqa qadar boshlang'ich tayyorgarlik xonasi (mulyajlar saqlash xonasi bilan) — 2,4 m²; chet tili xonasi — 2,4 m²; ikkiga bo'lib o'qitiladigan fanlar uchun xona — 2,5 m²; texnologiya xonasi — 6 m²; kimyo, fizika, biologiya fanlaridan laboratoriya xonalari — 2,5 m²; kutubxona — 0,6 m²; sport zali (ta'lim oluvchilar soniga ko'ra) — 9,0x18,0 m; 12,0x24,0 m; 18,0x30,0 m; v) qo'shimcha xizmat ko'rsatish uchun: faollar zali; oshxona; tibbiyot xonasi; xo'jalik xonasi (har qavatda bittadan); o'qituvchilar uchun hojatxona — 3 m² (har blokda alohida); ta'lim oluvchilar uchun hojatxona — 0,4 m² (o'g'il va qiz bolalarga alohida, har qavatda bittadan).
9.	Axborot texnologiyalari bilan ta'minlanganlik darajasi:*	kamida 50 % kompyuter texnikalari 10 mbit/sek tezlikdagi Internet jahon axborot tarmog'iga ulanganligi; kamida 50 % hududda Wi-Fi zonalar tashkil etilishi.
10.	Ijtimoiy himoyaga muhtoj oilalar farzandlariga imtiyoz taqdim etilganligi:*	jami ta'lim oluvchilar umumiy sonining 10 foizidan kam bo'lmagan miqdorda ijtimoiy himoyaga muhtoj oilalarning qobiliyatli va iqtidorli farzandlari tanlov asosida bepul o'qishga qabul qilingan bo'lishi (umumiy o'rta ta'lim tashkilotlari uchun).

QAYDLAR UCHUN

[illegible]